

靜

志

居

詩

話

靜志居詩話卷十六

秀水朱竹垞先生著

扶荔山房編

唐文獻字元徵松江華亭人萬歷丙戌賜進士第
一授翰林修撰歷中允諭德左右庶子掌詹事
升禮部侍郎翰林院學士教習庶吉士卒贈尙
書加太子少保諡文恪有占星堂集

郭文毅坐妖書被逮人莫敢前文恪周旋患難不避危
機當時稱爲長者其治家整肅嘗患江南子弟無家法
貽書告誡二子長諱允恭字欽甫卽彝尊之外祖也仕

兩浙鹽運司副遷石屏知州家藏殿試策神宗御題卷
面瘦硬通神曾捧觀于占星堂上占星堂者文恪未第
日人或見奎宿于堂於是徐奉化獻忠作記孫漢陽克
宏以八分書於門屏亂離尙存今已易主矣長安春日
感懷云已覺吾衰久行藏未自由江鄉千里思夢醒五
更愁鳥自吟清晝花應笑白頭初衣頻取拭肯負竹林
游

袁宗道字伯修公安人萬歷丙戌進士改庶吉士
授編修歷中允洗馬庶子贈禮部右侍郎有白

蘇齋集

嘉靖七子之派徐文長欲以李長吉體變之不能也湯
養仍欲以尤蕭范陸體變之亦不能也王百穀王承父
屠長卿雖迭有違言然寡不敵衆自袁伯修出服習香
山肩山之結撰首以白蘇名齋旣導其源中郎小修繼
之益揚其波由是公安流派盛行然白蘇各有神采顧
乃頽波自放舍其高潔專尙鄙俚鍾譚從而再變梟音
詭舌風雅蕩然泗鼎將沈魍魅齊見言作俑者孰謂非
伯修也邪

丁元薦字長孺長興人萬歷丙戌進士除中書舍
人歷尙寶少卿有尊拙堂集

慎所仕無言責而彊直自隨屢折不回劉啓東目爲名
臣第一高景逸亦謂正氣足以千古蓋東林諸公推許
若是其作五君詠於許孟中云夫子多苦心河津有正
路於沈純父云之子排天門隻手驅豐隆雖以贈友君
子以爲自道也

王嘉謨字伯俞直隸豹韜衛人萬歷丙戌進士除
行人選禮科給事中官至按察使

畿輔詩存
作布政使有

薊邱集

伯俞五言頗熟選理第北人用韻恒以入聲雜上去讀故不多存述懷云脈脈泉初生粼粼冰始泮嘯歌念古人俯仰成愁歎貴賤本無方乘時若有判草木滿中唐旨鷓巢其岍本欲慕崇高迺爲耳目翫

沈瓚字孝通一字子勺吳江人萬歷丙戌進士除南京刑部主事歷郎中出爲江西按察僉事告歸起補廣東僉事有靜暉堂集

子勺兄璟妙解音律撰南曲譜鄉里目爲詞隱先生居

家未嘗廢絲竹有子恒失學子勺去官身爲塾師教其
兄子一門之內一選伎徵聲一尋章索句論者比之顧
東橋兄弟云

附錄李伯遠云子勺詩格蒼以古致沖以遠高者何
減魏晉次亦不失爲陳射洪

袁黃字坤儀嘉善人萬歷丙戌進士除寶坻知縣
遷兵部主事有兩行堂集

職方導人持功過格鄉里稱爲愿人其說實本愛禮先
生劉駟加發揮焉然順親友兄弟皆自居以爲功終於

心有未安君子之學無伐善可矣潯陽夜泊云潯陽江
上鷓鴣啼茅屋青燈隔水西獨坐孤篷傷往事寒鴉飛
盡楚天低

徐燧字惟和閩縣人萬歷戊子舉人有幔亭集

惟和力以唐人爲圭臬七絕原本王江寧聲諧調暢情
至之語誦之蕩氣迴腸送人遊吳楚云津亭烟柳綠垂
絲萬里關山匹馬遞去國正當春盡後登樓多在日斜
時楚江草長悲鸚鵡吳苑花深走鹿麋話別何須共惆
悵秋風搖落是歸期

張文柱字仲立崑山人士淪子萬歷戊子舉人臨

清知州

附錄孫齊之云仲立才高燦發託意幽元正如水壺
秋月本宜著烟霞外迺強使適俗故少年卽有憂生
之嗟塞下曲云有鴈逐歸心無書返上林天山風不
斷秋早雪花深白草分秦甸清笳雜漢音將軍誇戰
馬價重一千金

焦竑字弱侯上元人萬歷己丑賜進士第一授翰

林修撰謫福寧州同知追諡文憲有漪園集

修撰晚拔巍科仕雖不達公望歸之亳州李文友仁卿
詩云文章南國多門下翰墨西園集上才蓋實錄也詩
特寄興若儲書之富幾勝中簿多手自抄撮惜近年俱
散佚矣絕句云花明月淡海天秋三十六重烟雨樓數
載欲歸歸未得看君先上木蘭舟

吳道南字會甫崇仁人萬歷己丑賜進士第二授
編修歷中允諭德少詹事兼侍讀學士遷禮部
右侍郎以憂去召拜禮部尙書兼東閣大學士
進太子太保戶部尙書兼文淵閣大學士贈少

保論文格有曙谷集

古之國史恒以本朝之人述當代之事故文獻足徵出於一家者無論已光武注紀定於永平武德貞觀國史成於顯慶宋則兩朝三朝五朝七朝四朝先後撰述揚前論議斯時政有紀柱下見聞斯起居有注類而次之謂之日歷修而成之謂之實錄然後一代之典備焉明則第有實錄實訓而已建文革除景泰附錄何以成一代之典章善夫吳文格之言曰曾南面者當知史不可滅之義曾北面者當思名必先正之文是兩朝帝紀不

可不特書也萬歷甲午允大學士陳文憲公之請詔工部葺史館禮部自尙書下同詹事春坊司經局翰林諸臣分門授事先太傅文恪公領修孝宗大紀而吳文恪公領修河渠志今載集中惜文憲公逝不獲竟其事今其條目志之類二十有二傳之類二十有六讀吳公正史議其大略猶可觀也然如中官之驕橫土司之順逆顧獨遺之何與因錄吳公詩附識於此送朱太史典試江右云紫陌新輶夾道看詞臣分命出金鑾片帆左蠡乘新漲一榻秋屏對早寒南國文裁運斤手西江派重

宋詩官何當更問閭閻苦歸與君王策治安

陶望齡字周望會稽人萬歷己丑賜進士第三授翰林編修歷中允諭德遷國子祭酒卒諡文簡

有水天閣歇菴二集

周望早年詩格清越超超似神仙中人中歲講學逃禪兼惑公安之論遂變爲芸夫蕘豎面目白沙在泥與之俱黑良可惜也塗中雜詩云一騎風塵裏千山縣郭東畏塗逢落日別思對孤鴻仗策心逾遠談詩氣更雄驅馳丈夫事不必恨飄蓬

董其昌字元宰松江華亭人萬歷己丑進士改庶
吉士除編修出爲湖廣提學副使召入爲太常
卿歷遷禮部尙書追諡文敏有容臺集

趙承旨諡文敏尙書亦諡文敏兩公書畫差足相當董
詩差不如趙鷗波之亭戲鴻之堂風流宏長一也望岱
詩云百里看山眼迢遙岱色分應爲天下雨不斷封中
雲漢簡千秋秘秦松萬壑聞何當馳匹練高揖碧霞君
送范爾孚北歸云旅食同千里分襟此一時烟沙征路
遠風雨客帆遲鄉夢隨芳草春愁帶柳枝平生任慷慨

能不灑臨岐

高攀龍字雲從無錫人萬歷己丑進士除行人謫
揭陽典史起光祿寺丞歷官刑部侍郎都察院
左都御史坐忤逆闕削籍被逮赴水死贈太子
少保兵部尙書諡忠憲有高景逸詩

先生天下規矩援世翼教不以聲律自繩然與歸待詔
訂金石契宜同心之言自成蘭臭也水居云薄暮登樓
四望遠疇時雨旣降農人乍休乳燕來止鯨魚出遊萬
族有樂吾亦何憂靜坐吟云我愛山中坐恍若羲皇時

青松影寂寂白雲出遲遲
獸窟有浚谷鳥棲無卑枝
物得所止人豈不如之
耕巖飲谷水常得中心怡

林堯俞字容伯莆田人萬歷己丑進士改庶吉士

除檢討累官太子太保禮部尚書卒諡文簡有

谿堂集

陳文定善書嘗以南祭酒奏績之京王振致酒幣請書
程子四箴文定書與之而却其幣論者題之亡友莆田
林嘉璣字衡者述其從祖文簡公亦善書法魏忠賢敦
請不與忠賢矯詔命公題扁公大書畏天堂三字題曰

禮部尙書某奉旨書時忠賢出餅啗公云出手製公以
南人不慣食麪辭忠賢方銜之公遽請歸里陛見德陵
謂曰長尙書乃欲歸邪賜之蟒玉以公儀表頡而長也
若兩公者明哲保身淵然不可犯士大夫當以爲師林
子又言公五言律原出右丞誦谿堂集信衡者不我迂
也楓亭卽事云落日楓亭驛秋風荔子園人烟山外盡
漁榜夜深喧地迴潮當寺僧聞月到門羣賢方豎義吾
意已忘言山行云肩輿纔出郭倚杖卽看山霜葉暗樵
路寒花淒客顏石門通鶴柵松嶺入雲關去去紅塵隔

鳴禽時往還

黃輝字昭素一字平倩南充人萬歷己丑進士改
庶吉士除編修歷中允諭德庶子少詹事兼侍
讀學士有怡春堂集

平倩盛有詩名而諸體未遒所謂似是而非者別汝鈍
云使者分岐路迢迢越五谿一爲孤鳳唱無復冷猿啼
方大鎮字君靜桐城人萬歷己丑進士除大名推
官擢江西道御史遷大理寺丞歷左少卿有方

大理集

少卿與鄒忠介馮恭定高忠憲顧端文諸公講學首善
書院書院毀筮得同人于野遂乞休自號野同翁年七
十廬母墓而終鄉人私謚曰文孝先生其歲杪聞召詩
云仕途百折如浮海客邸孤蹤似出家足以占所守矣

郝敬字仲輿京山人萬歷己丑進士知縉雲永嘉

二縣擢禮科給事中謫宜興縣丞再知江陰縣
稍遷行人司副有山草堂嘯歌

仲輿難經伉伉詩非所擅讀春秋云五霸亂王章春秋
實經始邦國有遺文修緝人臣禮筆削非新義興亡沿

舊史直道在人心毀譽吾何事後儒謾譎張紛紛凡例
起穿鑿隻字間褒貶悉由已匹夫爲素王何以懲賊子
惟有孟氏言庶得遺經旨

區大相字用孺高明人萬歷己丑進士改庶吉士

授檢討歷贊善中允有海目先生集

海目持律旣嚴鑄詞必鍊其五言近體上自初唐四傑
下至大歷十子無所不仿亦無所不合嶺南山川之秀
鍾此國琛非特白金水銀丹砂石英已也又云海目五
言律詩如純鈎初出拂鐘無聲切玉如泥又如鏡吹平

江秋空清響領一氏置而不錄予特爲表出取之

稍溢焉淮浦吟云淹泊清淮浦悵望丹水涯狂風吹我

舟不得早還家一解征夫念閨人非爲顏色好游子戀故

鄉非關萬里道二解東林寺云昔讀高僧傳兼懷逸士蹤

停車虎溪水對面香爐峰舊殿丹青落荒池蔓草茸我

來松下坐日暮但聞鐘厓門弔古云遺恨前朝事吾來

問水濱乾坤存一旅社稷有三臣慘澹勤王志間關護

主身至今厓畔石風雨洗凝塵

附錄一云嶺南自張曲江倡正始之音明三百年

詩之美者海目爲最在泰泉蘭汀崙山之上

鄭明選字侯升歸安人萬歷己丑進士除安仁知縣擢南京刑科給事中有鳴缶集

先生五言近體全學高達夫七言近體全學杜子美語不求工而句錙字鍊卓然名家是時汪伯玉劉子威馮元成屠緯真輩類守其聲殼而遺其神明其在西吳徐子與吳俊伯皆然先生之詩遂無人賞激者以致錢氏列朝詩集僅錄數首予故取先生之作特多天下之寶要當與天下共之也短歌行云九月豆葉黃十月菊花

稟朔風一何寒清霜凋百草時物頓如此人生亦以老
憂日常苦多歡日常苦少攬鏡令人悲朱顏非昔好與
楊二叔純云許子南昌去王孫曠縣遊舊交如雨散春
水滿城流不見江邊閣徒懷雪裏舟故鄉惟汝在莫惜
屢相求暫移山居云春晚營蠶事移居郭外邨白花低
覆水翠竹遠侵門拂几開殘帙攜鋤理廢園鄰人儻相
訪薄與酌清尊邳州晚泊云日落留侯廟春深呂布城
殘花晴抱蝶細柳暗啼鶯漸集河船密遙生野燒明客
愁無可慰膝上一絳橫官舍晚酌云百里山圍縣雙江

水對門日斜初解帶秋爽一開樽家遠思親舊官貧任
子孫醉看青竹淨纖月照黃昏

王士騏字問伯太倉州人尙書世貞子萬歷壬午
鄉試第一己丑進士由禮部主事調吏部員外

郎坐妖書獄削籍有醉花菴詩選

問伯醉花菴詩不拾過庭片語贈別云東風吹柳柳成
絲細雨釀花花滿枝可惜春光正貽蕩相逢恰是別離
時

歸子慕字季思崑山人萬歷辛卯舉人崇禎初追

贈翰林待詔有陶菴集

季思善病再試南宮歸而屏跡田里所居陶菴插槿爲牆縛茅爲屋小如蝸殼瓠子養疴其中迭相往還講學者無錫高攀龍存之嘉善吳志遠子往主客從容晏坐默識凝然不語一有所得輒怡悅相告存之稱其有絕人之慧絕人之識絕人之趣又言季思出諸口者不漫作無味語筆諸書者不漫作無味辭措諸躬者不漫作無味事卽其眉宇顰笑足以洗濯一世塵垢傾倒可云至矣季思雖病猶授生徒友人勸其輟講報之書云生

徒固無累於我豈惟無累且以爲樂清晝飯餘滄江日
落或童或冠油油與偕共坐槐陰閱譚啜茗臨江藉草
以觀雲物風帆往來於日農歌不輟於耳亦可謂至樂
矣君子謂其樂天知命焉季思卒時年四十有四崇禎
下詔特贈翰林待詔其詩學陶而得其神髓韋蘇州後
鮮有其倫誦之令人增陋巷簞瓢之樂歲暮別諸生云
惻惻不可道臨岐但依依常恐語言多貌勝中情微感
茲寒色厲北風吹爾衣歲暮室家好各各念爾歸羣居
雖云樂人情理難違所患不同心不思相見稀尼父重

久要如醴久已非勗哉儀先民雅道庶可幾感悟云人
人惜富貴富貴諒難私居位食其食抱關有收司若懷
凍餒憂不如農桑宜平心任公道天下能者爲人事當
前昏事後更相嗤三十五年前歷歷皆可思以此徵後
來何勞復多疑願言謝將迎履坦希前知雜詩云日出
羣動作智計千萬端用此徒爲勞不用不自安所繇在
有身坐令思慮殫所以古賢達與物同一觀俛仰任所
之宇宙何其寬對客云嘿然對客坐竟坐無一語亦欲
通殷勤尋思了無取好言不關情諒非君所與坦懷兩

相忘何害吾與汝北地曉征云夜半寒雞不忍聽主人
炊熟夢初醒出門不復知南北馬上持鞭數七星

附錄愚山云季思清真靜好五言詩澹雅似其爲人

沈山子云古今效陶而肖者王韋之外不得不推

季思

張民表字林宗一字武仲中牟人萬歷辛卯舉人

有原圃寒菴詩集

寇圍大梁汴人死守不降有獻策高巡撫名衡者曰賊
營附大堤決河灌之盡爲魚鼈矣周王募民壘羊馬城

高厚如岍援兵掘朱家砦口賊黨覺之移營高岍多儲
大航巨筏反決馬家口以灌城河驟決聲震百里排城
北門入穿東南門出流入渦水渦忽高二丈士民溺死
數十萬林宗負其先祠木主登筏鄰竝求登者衆林宗
不忍移筏就之筏且沉乃移筏登屋水大至而沒久之
門人周侍郎元亮爲刊其遺集僅存百一爾存者悉非
其稱意之作可惜也夫

附錄愚山云林宗十上不第有廬舍在夷門內客至
必畱之醉頂高冠飄二帶帶上繡東坡半升僅澆淵

明酒三寸纔容子夏冠之句乘柴車無幔一老特牽
之朗吟車中日醉卧南陂老杏樹下弟子扶掖而歸
兀傲自放世莫測其淺深也崇禎壬午黃河決年七
十三死於水

朱燮元字懋和紹興山陰人萬歷壬辰進士除大
理評事累官兵部尙書兼右都御史總督川湖
雲貴加太師有恒岳遺橐

太師儀表豐偉飲噉倍十餘人其蒞湖南川貴土司以
壺漿乾肉迎車前相接於道公傾槃倒甕一無畱餘衆

皆驚歎曰此天人也相誠不敢出犯歲既久威望著於西南比之蜀相諸葛云公詩不多作句如買得勞薪先煮酒不嫌疎鬢也簪花荒徼有誰憐白髮故園亦自有青山越人至今傳誦之

吳士奇字無奇歙縣人萬歷壬辰進士除知寧化縣調歸安升南京戶部主事歷官陝西左布政使遷太常寺卿有綠滋館集

太常畱心國史草成副書藏于家遺橐爲江都汪楫存貯較諸野史頗純正第稍略耳詩特餘藝要非所長灑

瀕一律云孤根夾浪擁江間百二層巒片石關急峽倒
流天上水高灘下指榜頭山形同牛馬心逾怖舟近魚
龍膽詎豚聽說風波前更惡來朝百丈費牽攀

李日華字君實嘉興人萬歷壬辰進士除九江府

推官謫汝州判官轉西華知縣徵遷南京禮部

主事升尙寶司丞歷太僕少卿有恬致堂集

太僕恬澹自持居官日淺優游田里以法書名畫自娛
家近春波橋爲吳仲圭舊里暇寫墨竹兼擅雲山其詩
非選非唐別裁風格頗與王辰玉陳仲醇同流微尙纖

豔近家宴集語山居二絕云雪花撩亂撲春蟲擁褐單
牀睡思濃夢裏一聲聞折竹呼僮亟徙小盆松四月雨
晴山路香松花灑地鶴翎黃輕衫短笠荷鋤去斲得青
芝一尺長

謝肇淛字在杭長樂人萬歷壬辰進士除湖州推
官移東昌遷南京刑部主事調兵部轉工部郎
中出爲雲南參政升廣西按察使歷左布政使
有小草堂集

在杭格不聳高而詩律極細其持論亦平如于鱗元美

敬美子與伯玉皆所傾心漫與詩云徐陳里閤久相親
鍾李湖湘非吾鄰丸泥久已封函谷怕見江東一片塵
徐指孝廉維和山人與公陳謂文學汝大孝廉幼孺山
人振狂是時景陵派已盛行而在杭能距之又云石倉
衣鉢自韋陶吳越從風赤幟高若問老夫成底事雪山
銀海瀉秋濤此則在杭自任匪淺矣

附錄張幼于云在杭蓄藻于建安騰聲于慶歷希躡
于少陵泛駕于長慶兼綜潘陸妙契陶韋其辭宛以
麗其氣雄以健其摠思優以雋其援事典以則其振

響和以平既美才情尤深寄興

袁宏道字無學公安人宗道之弟萬歷壬辰進士
除吳縣知縣改京府學官國子博士遷禮部郎
調吏部移病卒于家有錦帆解脫瀟碧堂餅花
齋華嵩游草破研齋廣陵桃源傲篋等集

傳有言琴瑟旣做必取而更張之詩文亦然不容不變
也隆萬間王李之遺派充塞公安昆弟起而非之以爲
唐自有古詩不必選體中晚皆有詩不必初盛歐蘇陳
黃各有詩不必唐人唐時色澤鮮妍如旦晚脫筆硯者

今詩纔脫筆硯已是陳言豈非流自性靈與出自剽擬
所從來異乎一時聞者渙然神悟若良藥之解散而沉
疴之去體也乃不善學者取其集中俳諧調笑之語如
西湖云一日湖上行一日湖上坐一日湖上住一日湖
上卧偶見白髮云無端見白髮欲哭翻成笑自喜笑中
意一笑又一跳嚴陵釣臺云人言漢梅福君之妻父也
此本滑稽之談類入於狂言不自以爲詩者乃錫山華
聞修選明詩從而擊賞歎絕是何異棄蘇合之香取蝮
蟻之轉邪予於中郎盡汰其鄙俚之作存其稍用意者

對之可以刮目矣橫塘渡云橫塘渡郎西來妾東去感
郎千金顧妾家住紅橋朱門十字路認取辛夷花莫過
楊柳樹妾薄命云落花去故條尙有根可依婦人失夫
心含情欲告誰燈光不到明寵極心還變只此雙蛾眉
供得幾迴盼看多自成故未必真衰老辟彼後開花不
若初生草歸來一律云歸來兄弟對門居石浦河邊小
結廬可比維摩方丈地不妨楊子一牀書蔬園有處皆
添甲花雨無多亦溜渠野服科頭常聚首阮家禮法向
來疎擬宮詞云玉殿蓮籌夜未央內人傳旨出昭陽朝

來剛赴西宮約莫遣經筵進講章

附錄弟小修云錦帆解脫意在破人執縛間有率意
游戲之語或快爽之極浮而不沉情景太真近而不
遠要出自性靈足以蕩滌塵坌學者不察效顰學語
其究爲俚俗爲纖巧爲莽蕩烏焉三寫弊有必至非
中郎之本旨也

江盈科字進之常德桃源人萬歷壬辰進士除長
洲知縣擢吏部主事歷官四川提學僉事有雪

濤閣集

進之與袁中郎同官吳下其詩頗近公安派持論亦以
七子爲非特變而不成方者中郎謂其矯枉之過所謂
笑他人之未工忘己事之已拙文人通病大抵然矣

又云徐秀才善敬可一日語予曰周公瑾小人哉張魏
公朱子所父事何可毀也予曰公瑾三代直道之遺也
宋之南渡將帥有人可以戰可以守自寄閩外之權于
浚喪師動數十萬元氣重傷譬諸孱夫不能復起矣浚
於李綱趙鼎輩則劾之於汪伯彥秦檜等則薦之尙得
云好惡之公平至曲端之誅與檜之殺岳飛何以異而

讀史者務曲筆以文致端有可死之罪不過因浚有子
講學浚死徽國公爲之作狀天下後世遂信而不疑爾
中郎朱仙鎮詩已極悲惋不若進之讀張魏公傳有感
曲壯愍事云子聖焉能蓋父凶曲端冤與岳飛同何人
爲立將軍廟也把烏金鑄魏公露膽張目洵詩家之南
董也已

唐之屏字君公松江華亭人萬歷壬辰進士除常

山知縣

君公之官常山鄉鄙贈以僕馬力却之曰常山斗大縣

官便自裝飾苟至三槐九棘更難踵事增華旣而中讒
罷歸養親不復出登金山一律云一柱東南表地靈芙
蓉萬古插清冷江淮潮色無邊白楚蜀山光不斷青鯨
喩風雷波自撼龍過樓殿雨猶腥枕流無限滄洲意極
目何妨我獨醒

朱之蕃字元介南京錦衣衛籍荏平人萬歷乙未
賜進士第一授翰林院修撰以右春坊右諭德
掌院印以右春坊右庶子掌坊印升少詹事進
禮部右侍郎改吏部右侍郎卒贈禮部尙書有

使朝鮮橐南還紀勝諸集

元介文翰兼工張壇東國與館伴周旋有倡必和微嫌
詩材愜熟語不驚人和周吉甫春日移居云墻短山齋
出庭空月易留泉香浮茗盃漁唱起蘋洲終歲一無事
平生百不憂奔忙渾未解酒伴且相求

湯賓尹字嘉賓宣城人萬歷乙未賜進士第二授
翰林院編修歷中允諭德掌司業事遷右庶子
改升南國子監祭酒有睡菴集

嘉賓以黨論受攢譏終以不振詩派近俚罕足錄者用

同年友於鼎季云落木淒淒江水渾行吟澤畔已聲吞
三年地下君安否人世風波不可言蓋弔懷寧於國重
也

孫慎行字聞斯武進人萬歷乙未賜進士第三授
編修歷中允諭德庶子少詹事升禮部右侍郎
回籍起南京禮部尙書改北卒贈太子太保諡
文介有元晏齋集

要典三案羣小切齒者槌擊則朝邑王侍郎移宮則應
城楊忠烈紅丸則文介也要典旣頒至欲坐公等罔上

不道幾且殺公幸思陵卽阼得辭成所復官仍堅卧不起久而赴召甫及都而卒平居研精易學吟咏不甚畱意其觀元祐黨人碑有感作云誰知黨人籍翻作褒忠碑曠世相感今古同然矣

陳于廷字孟諤宜興人萬歷乙未進士授光山知縣補秀水擢監察御史巡按江西山東轉太僕少卿歷太常卿大理卿兵部侍郎坐削籍起南京都察院右都御史召總內臺加太子少保諡恭定有定軒橐

恭定爲予友其年檢討之祖行事詳國史韻語不甚傳
擬江文通雜詩頗稱具體古別離云三歲爲君婦未嘗
下高堂一朝遠送別佇泣官道傍君行官柳青君歸官
柳黃與君別經年相思莫相忘行過無定河莫飲無定
水天涯游子心飲之恐爾爾應思閨中人容光易摧毀
王維儉字損仲祥符人萬歷乙未進士除知濰縣
徵授兵部主事尋削籍起光祿寺丞累遷大理
少卿以僉都御史撫山東入爲工部右侍郎轉
左侍郎有王損仲集

損仲宋史記予從吳興抄得之未見出人意表詩頗瀏
亮送霍臨渠少府守河州云不盡湟中路秋風促宦程
佩刀辭佐郡分虎已專城積石攢雲起洮河近郭明羌
戎亦赤子休使塞烟驚

附錄愚山云損仲詩清婉而近于弱爲文求歸簡質
未脫蹊徑嘗苦宋史煩蕪刪定虜書吳興潘昭度抄
得副本今損仲家圖籍盡沉于汴京之水未知吳興
抄本云何

王思任字季重紹興山陰人萬歷乙未進士知興

平當塗青浦三縣袁州推官所至鐫級稍遷南
刑部主事九江僉事有避園擬存愚山詠

季重滑稽太甚有傷大雅勺園一絕云纔辭帝里入風
烟處處亭臺鏡裏天夢到江南深樹底吳兒歌板放秋
船

附錄愚山云季重頗負時名自建旗鼓其詩才情爛
漫無復持擇入鬼入魔惡道全出鍾譚之外又一傍
派也

蔡復一字敬夫同安人萬歷乙未進士除刑部主

事歷員外郎中出爲湖廣參政遷按察使仕至
兵部右侍郎卒諡清憲有遜菴詩集

景陵之邪說行率先倒戈者蔡敬夫也其駢體亦不屑
猶人亡友漢陽王亦世最賞之然以詩論寧取彼而舍
此矣秋坐云夕照盡歸水秋聲半在林飛蟬過別樹未

斷曳來

一作音
舊枝

高承祚初名承禪字元錫號鶴城松江華亭人萬
歷壬辰中會試乙未賜同進士出身改庶吉士
授檢討有知古堂集

太史生時父夢高僧入其門因名之曰承禪及萬歷已
卯銅梁高中允啓愚會稽羅侍讀萬化主考南畿以舜
亦以命禹發題監臨者方懷舜禹傳授之嫌內江陰長
卿爲應天府尹改填榜作祚後主司以黨附江陵獲罪
鶴城以更名免挂吏議鶴城廉介自持官翰林二十年
田不加半畝屋不改一椽予聞之李高士延是云聚首
一絕云人生聚首難離別何可久去日三春花今朝九
秋柳沈覃九云語不在深詩家合作

賀燦然字伯闇秀水人萬歷乙未進士授行人升

吏部主事終員外有六欲軒五欲軒集

吳中伍御史袁萃撰林居漫錄詆諆前輩淆亂是非吏部不平作漫錄評正駁之御史復撰駁漫錄評正吏部又作駁駁漫錄評正兩公不亦好辨哉然合而觀之曲直自見國史所宜審擇也

米萬鍾字仲詔宛平人萬歷乙未進士除永寧知縣補銅梁再補六合入爲大理右評事遷戶部主事升員外改工部進郎中出爲浙江右參政升江西按察使有北征吟

先生爲水曹郎築園海淀之北中有色空天太一葉松
垞翠葆樹林於澁總名之曰勺園又曰風烟里自念園
在郊關不能日涉因繪園中景爲燈邱壑亭臺纖悉具
備都人爭尙之號曰米家燈嘗於元夜集客賦詩麗水
呂太常邦耀卽席口占二首其一云玉綃疊出上元村
雙炬懸來景物繁恍惚重游邱壑裏米家燈是米家園
其二云輕舟寒夜渡無冰波入銀綃訝月升宛似夢中
曾一照米家園是米家燈一時和者數百人列成一集
可稱好事亦太平佳話也

范允臨字長倩松江華亭人居吳縣萬歷乙未進士授南兵部主事改工部歷郎中以按察僉事提學雲南遷福建布政司參議有翰蓼館集

先生筆精墨妙揮毫落紙與董尙書爭工晚築別業於天平山之陽彈絲吹竹選伎徵歌江表望爲神仙中人又得佳耦唱和傳鈔片楮比於珊瑚之鈎范氏家藏遠祖隋其唐時告身尙在文正忠宣譜老手澤猶新義田長以振窮宰木未嘗改列清門百代四姓遠不及也詠剪春羅云君恩宴曲池爲郎製宮錦月落杏花寒裁縫

剪刀冷有憶云井唾不復顧花飛難再攀江頭一片石
應化文郎山

附錄愚山云長倩意匠浮動墨瀋橫飛未嘗以琢句
襞績爲工如雪山池中甄陀女歌聲柔軟能使清淨
五百仙人皆心逸不自持

陸錫恩字伯承平湖人萬歷乙未進士除萬安知
縣入爲刑部主事歷員外郎有雙鳧草

伯承不耐判牘放情山水間自號夢蝶居士又號癯丈
人亦號癯丈夫年四十二自撰壙誌而殞詩頗澹雅鮑

叔牙故里云落景滿齊郊雲橫暮山紫緩轡問遺封云
是鮑叔里三北識奇才一匡酬夙恥古人在信心今人
多貴耳士苟未遇時畢生行蓬累長風不我借羽翼安
得起所以管大夫沒齒感知已

呂克孝字公原青浦人萬歷丁酉舉鄉試第一官
工部司務歷郎中有媿翁詩草

公原領解之秋先文恪葉文忠偕主試事先公業拔公
原卷將置第一矣文忠謂是卷文雖高慮終不得第先
公云吾亦知此人不第然學者也榜遂定旣而公原屢

試南宮輒擯落以學行稱於時先輩衡鑒不爽若是天
 啓初公原官工部司務時先大父君籲公承蔭選授都
 察院照磨署經歷司事同公原建首善書院乾魚脫粟
 比坊塲匠石不有加味書院成大父已遷官故碑記不
 列名旋爲梁夢環所彈下獄思陵卽阼得釋晚知楚雄
 府事歸貧不能治舟楫而公原還里詰窘略同其詩有
 云客歸三日典春衣又云慣住低頭屋能炊折脚鐺殆
 實錄也

徐良彥字季良新建人萬歷戊戌進士知婺源溧

水二縣擢河南道御史外轉福建參議轉山東
按察副使入爲尙寶司少卿歷大理寺丞右通
政以右僉都御史巡撫宣府回籍起南大理卿

升南工部右侍郎

侍郎語多獨造其塞上曲云長城陳死人有力皆如虎
亦警策也落葉云落葉不上枝因風亦復起清風本無
私何因有彼此一葉隨飄蕩一葉沾泥滓寄語風前葉
莫障東流水

鄧漢字遠游建昌新城人萬歷戊戌進士除浦江

知縣調秀水再調內黃徵授河南道御史巡按
雲南升山東副使轉浙江右參政山東按察使
擢右僉都御史撫順天有雷夷館南中紅泉諸
集

遠游詩敦琢而出頗近俞羨長何无咎二山人微嫌鬱
轆耳然勝楚人之咻多矣田家樂云烟火高原合雞豚
小市通夜行防虎阱寒至築牛宮捕雀遵桑翳澆麻引
竹筒今年倍收秫不怕甕頭空挾彈驅田鼠持竿放野
豚但令倉有粟寧使婦無禪賣藥會過市催租少到門

不知今去漢歷代幾兒孫

范鳳翼字異羽南直隸通州人萬歷戊戌進士除
灤州知州屢遷吏部郎中天啓初歷尙寶少卿
以朋黨落職崇禎初起復尋遷光祿少卿有勲

卿集

附錄鄭元岳云公在吏部以用賢遠姦爲已任有一
君子必亟進之如顧端文高忠憲是也有一小人必
亟退之如楊欝杜縻牛惟躍是也其見善如渴見不
善如讎而忌者至矣以八年里居之官而望拾遺之

疏以十七年不入都門之人而奉削奪之旨公獨處
之怡然所謂德音不瑕者與夏日五柳園讌集云三
徑何幽勝居然陶令家涼風鳴豆葉疎雨落桐花虛
院疑秋早深林信日斜最憐塵事隔心賞足烟霞

吳文企字季騮號白雪南京旗手衛籍景陵人萬
歷戊戌進士除戶部主事歷郎中出知寧波湖
州二府終陝西按察副使有絮菴慙錄

白雪廉吏守湖州時爨薪不給課僮僕刈後園豐草折
枯樹以炊拾得石一片上有玉筍二字其旁題識已滿

乃宋元豐間物笑曰太守落落如此石石應太守將去
及遷秩載之以歸置香雨樓聞至今尙在也其菽蘆集
在湖所著詩頗饒清韻同寮友題資福寺云行到寺邊
寺坐看山外山講堂分戶牖野席對溪灣暗水香廚引
高雲絕頂還茶瓜深話久欲起更牽攀汎舟碧浪湖云
紺塔高懸山寺蘭舟不遠人家載出邨莊兒女折來楊
柳桃花小櫂白蘋洲渡輕帆碧浪湖風歸到郡城春望
湖山盡在樓中

高出字孩之萊陽人萬歷戊戌進士知曲周高陽

盧氏三縣升南京戶部主事歷郎中出爲蘇松
參議遷副使轉河南參政升按察使降廣寧道
監軍副使改西平堡監軍有盧隱郎潛二集

孩之家木東萊不襲歷下遺派如蘋婆果初生食之味
雖近醲猶勝冬月儲藏軟同絲絮古意云鳳鳥久不至
丹穴邈難尋如其今來儀不異他山禽所以鳴岐後千
古閱其音

阮官華字堅之懷寧人萬歷戊戌進士除福州府
推官歷遷戶部郎中出知慶陽府再補邵武罷

歸有霧靈集

堅之跌宕縱飲爲理官扶醉人謁巡按方下拜酒污御
史衫袖遂挂彈章晚爲郡守不視吏事惟與賓客分簡
賦詩遨遊山水而已嘗大會詞客於凌霄臺推屠長卿
爲祭酒絲管交作列炬熏人復爲巡按所糾庶幾狂簡
之士乎詩不求工君子誦詩論世寧舍詠懷堂而取霧
靈集也

曹徵庸字遠生一字平子平湖人萬歷戊戌進士
辛丑殿試由延安推官人爲大理評事選刑部

主事歷員外郎中終汾州知府有冰雪軒詩集
汾州詩品超逸誦之如食哀梨脆棗大是爽俊和秋柳
詩云長信宮前幾樹彫風吹灞岸更蕭蕭空勞好夢三
千里無那輕霜十萬條青眼乍迷魂黯黯蒼烟忽暗路
迢迢却憐二月春寒淺占斷東風紅板橋

公鼎字孝與蒙陰人萬歷辛丑進士改庶吉士授

編修歷少詹事禮部右侍郎卒諡文介有問次

齋彙

言詩於萬歷則三齊之彥吾必以公文介爲巨擘焉卽

其論詩大指云風雅之後有樂府如唐詩之後有詞曲
聲聽之變有所必趨情詞之遷有所必至古樂之不可
復久矣後人之不能漢魏猶漢魏之不能風雅勢使然
也如漢朱鷺翁離之作魏晉諸臣擬之以鳴其一代之
事易名別調當極其長豈以古今同異爲病哉後世文
士如李太白則沿其目而革其詞杜子美白樂天之倫
則創爲意而不襲其目皆卓然作者後世有述焉近乃
有擬古樂府者遂顯以擬名其說但取漢魏所傳之詞
句模而字合之中間豈無陶陰之誤夏五之脫悉所不

較或假借以附益或因文而增損跼踖牀屋之下探眈
滕篋之間乃藝林之根蠹學人之路阱矣以此語於作
者之門不亦憊乎夫才有長短學有通塞取古今之人
一一強同則千里之謬不容秋毫肖貌之形難爲覲面
若曰樂府則樂府矣盡人而能爲樂府也若曰必此爲
古樂府使與古人同曹而竝奏之其何以自容哉李于
鱗曰擬議以成其變化噫擬議將以變化也不能變化
而擬議奚取焉又云律詩出於古詩而難於古詩七言
後於五言而難於五言故七律於諸體中最不易工古

今長技惟杜氏耳杜氏之長則秋興懷古諸將數篇而
已近世擬作甚多大率淺率牽合觀者厭焉又贈邢子
愿長歌云爲君歷代選宗工前稱宏正後嘉隆北地雄
渾真大雅步趨盡出少陵下汝南俊逸誠天然邊幅姿
態未全捐濟南匠心奇且麗藻績無乃傷辭意武昌才
美謝諸君節制之師獨出羣東吳囊括靡不有利鈍未
能免人口大抵明興只數家瑜者從來不掩瑕餘子紛
紛未易說擬議原非吾所悅丈夫樹立自有真何爲效
彼西家顰蓋力攻摹擬之非然觀其七律仍以歷下爲

卷十一
宗故有文章一代李滄溟之句同時名家者馮用韞于
念東王季木皆拔萃者也

袁懋謙字吉卿豐城人萬歷辛丑進士改庶吉士
授兵科給事中有虎溪詩選

給事東封日本歌云司馬頻年苦運籌東封擬解廟堂
憂如今却似商人婦愁水愁風望去舟此嘲東明石尚
書拱辰作也

茅瑞徵字伯符歸安人萬歷辛丑進士除知泗水
縣調黃岡擢兵部主事歷郎中終南京光祿寺

卿卒贈大理寺卿有澹樸齋集

大理鹿門從孫家世饒裕鹿門孜孜治生大理耽情吟
詠歷官有廉吏之目壯年卽解組歸田自敘云炙手不
知炎下石不知險脂膏不知潤軒冕不知榮胸無機械
意無好醜殆天下之至愚人也因自號茗上愚公官職
方時著有象胥錄三大征考詩亦真率自喜彭城懷古
云望彭城彭城面面水環匝與城平君不見馬中赤兔
人中布引水灌城走無路

俞彥字仲茅太倉州人萬歷辛丑進士除兵部主

事歷員外郎升光祿少卿有擬古樂府

少卿擬古樂府自南北朝入亦是解人第篇幅稍長輒未合古此韓退之所云不造其堂不啻其蔽者也讀曲歌云與歡橋頭別楊柳纔垂絲空局不著子尋思未有棊作蠶絲云蠶老變成蛹吐絲外成繭但見外綢繆中心無由見折楊柳云二月江水平春洲春樹生垂楊復垂柳新雨更新晴蕩子年年別東風歲歲情捉搦歌云兩馬異力問輿騶兩絲異色問離婁兩狐異革問司裘兩人異處問蹇修

譚昌言字聖俞嘉興人萬歷甲午鄉試第一辛丑
進士知常熟婺源樂城三縣遷南兵部主事歷
員外郎中升福建參議提學轉山東按察副使
以參政卒於官贈太僕寺卿有狷石居遺集

譚公宰嘗熟識瞿起田於諸生中移婺源盡鐫徽國文
公遺書儲之高閣課士子誦習迨視學于閩杜絕請託
試卷不假一人寓目皆手自甄綜案未發公子來省覲
寄食旅店中不許人解嘗自謂此官可棄此案不可移
蓋視學三年而鬚髮盡白矣分守東萊有濰令與遼將

相構遂以遼兵叛聞巡撫初蒞倉皇入奏檄登兵會勦
登營多遼人偶語籍籍公大言曰遼將吾將遼民吾民
誰敢言發兵者入營握遼鎮李性忠手令馳箭諭濼營
將士皆感泣毛帥在島門舉朝交倚爲重公獨以東江
進兵爲厲局曰此登寇爾公以積勞嘔血死思陵卽作
卹以死勤事諸臣特贈公太僕卿公在畱都結詩社讀
史社詩愛孟襄陽第不多作

徐禎稷字叔開松江華亭人萬歷辛丑進士除刑
部主事歷員外郎中出知藝州府遷按察副使

致仕起補浙江溫處道以病引歸有餘齋集

叔開清門廉吏比於胡威父子其在夔府寄書家中附
詩云寄語機雲山水下山仍似在山清蓋入蜀之後
詩尤深婉句如千盤白鶴雲中路三暮黃牛峽口船臥
閣秋雲生白帝登臺春雪和巴人雲邊古堞三千雉花
裏春城十萬家水白瞿塘聞榜柁雨晴赤甲見桑麻入
春江勢疑吞郭一雨山光盡到樓天末鴈稀秋色盡山
家橘熟夜霜清新猿雨後瞿塘路獨鴈風前故國心俱
瀟灑出塵

趙彥復字微生杞縣人萬歷甲辰進士官至湖廣

按察副使有趙微生詩選

微生牽絲作宰不以簿書廢吟咏晚輯李獻吉何仲默
王子衡孟望之薛君采高子業劉子素張助甫謝茂秦
九人之詩目曰梁園風雅而以己作附之以爲獻吉籍
本扶溝聚族於斯婚嫁於斯長子孫於斯營邱墓於斯
非梁人而何君采之先出自偃師而隸武平亦籍茂秦
爲趙王客因卜居子孫遂畱不歸鄴志載在流寓故亦
入選中州之文獻得存其略焉

沈珣字幼玉吳江人萬歷甲辰進士授中書舍人
選山東道御史巡按貴州尋轉福建參政歷湖
廣按察使河南右布政司山東左布政使擢都
察院右副都御史巡撫山東有淨華菴橐

先伯祖贈尚書君輿公爲沈公分校京闈所拔其後申
以婚姻公之曾祖漢正德辛巳進士伯位隆慶戊辰進
士同懷兄琦琬從兄璟瓚先後皆衣柳汁釋褐門才之
盛甲于平江而子姓繼之文采風流代各有集則尤世
祿之家所難矣晚愛逃禪所至廨舍輒事埽除或笑以

爲傳舍何必乃爾公曰宛其死矣他人入室吾未見故
廬非傳舍也其達觀如是詩頗圓熟略與曩弟雁行春
日懷長兄在燕云聞道幽燕地蕭條異故鄉沙昏天欲
黑春半草猶黃馬足衝霜冷鴻聲聽夜長今宵千里月
飛夢舊池塘江南春云繁花紅映赤欄橋楊柳新隄繫
畫橈三十六陂春水碧滿船明月一聲簫女郎綺生卜
居江上云窈窕紅樓隔舊京重簾瑟瑟擁雕楹樓前咫
尺官橋路認得蕭郎白馬聲

郝承燦字爾光紹興山陰人萬歷甲辰進士授寧

陽知縣調長洲遷南刑部主事轉兵部歷員外
郎申出知吉安府京察謫沂州同知稍遷宿州
知州入爲兵部員外歷河南按察僉事副使江
西右參政有澹生堂集

參政富於藏書將亂其家悉載至雲門山寺惟遺元明
來傳奇多至八百餘部而葉兒樂府散套不與焉予猶
及見之其手錄羣書目八冊今存古林曹氏寺中所儲
已盡流轉於姚江禦兒鄉矣聞警一律云醫巫閻下水
東流填盡枯骸剩作邱當局豈皆肉食鄙傍觀寧盡杞

人憂旣知殘奕惟爭劫坐視危檣欲覆舟可是樞臣饒
遠策故將鎮靜作良謀

林漢翀字峻卿長洲人萬歷甲辰進士除福清知
縣選陝西道御史卒贈大理寺卿

張子野吳興寒食詞中庭月色正清明無數楊花過無
影余嘗歎其工絕在世所傳三影之上詠梅者類取材
於疎影暗香侍御獨以無影形容之亦奪胎法也詩云
玉蕊含風香莒枝帶霜冷夜靜月冥濛空庭卧無影

靜志居詩話卷十六